

Pita tiratna outna timbiņ rapar

Outna kam

Na Pita ma gan timbiņ rapara tirrinanna, ma Iesusa ripacrena laiplacarta wiwitta makukar anikca mbukca eacrinanna, ritipaikmo moi gagarana. Na ma aindoprina, Iesusa ripacrena laiplacara mina Iesus Karaisna kam wemban laņna moca mac lamņiraņ. Na Iesus, ma menaca ma mac nda ngeprina, na ma gaindta kam leacrina, ma nda kipnandet. Na mina an kam leacna moca mana nda kikipna ndabirena.

Na anna gidik, Iesusa ripacrena laiplacara makukara mbukrenan, na an reikca aind ndarurinanna, anna mina ritipaikca towaina larurina reik. Ainda moca mina gagraca ripaca tanņa Karaisna mac nda kikipna min mbuņa, mina ndorita katumna gagam laņa aņņinandet.

Aia Raraņ Aetaniacna wiwitna meikramtair gidkara laruri, na aia tipemb kirarir laiņa moraņna, te, aia aņņina reac laņa lambina

(1.1—2.10)

¹ Na aku Pita, Iesus Karaisna up aņņirena ramoot. Na gan timbiņ rapara aku nemo Raraņ Aetaniacna meikramtaira pitrik Pontusnan, na

Galesianan, na Kapadosianan, na Esiananapa, Bitiniananmo keker toca tamtamma loraca eacrenanna morinan. ² Na atu ngoinna Raraŋ Aetaniaca, ma Aet, na ma nenmo lamnjirinan, na ma nenmo larapaca ne mana meikramtaira larurinan. Na Neronŋ Ratta nenmo muruŋa ota-catke, ne ndorimo Raraŋ Aetaniac maneŋgat, na ne rat malaruat. Te, ne Iesus Karaisna kammo wandoŋa raŋgaina. Na mana racaindpaikca nemo ru tukica, ne Raraŋ Aetaniacna lamniac ngoutta ne meikramtair rat ndarunandet. Te, ma nenmo kadmaica, nena iroar inkarmo moi wewettaca gagaraca laŋ ndeacnandet.

Iarwarna eteacna watta aimo tamuŋna auŋa lambica eacrenan

³ Aintik aia Raraŋ Aetaniacna imo aŋgi ŋgep, ma Raraŋ Aetaniac, na ma aina Kacoot Iesus Karaisna Aet. Na ma aina kakadmaina opotac laŋ aniacap, na ma Iesus Karaismo muk iniknan mac nda moa ŋgepatna. Na an taup mbuŋa ma aimo iarwarna eteacna wat ŋgamma neaŋrinan. Na an iarwarna eteacna wat ŋgamma aimo moa gagraca, ma aimo neaŋ ndoprina reikta lambi taŋi minna tik te, ma aimo neaŋnande. ⁴ Na ma aimo larapacat tik, aia auŋ tamuŋna iarwarna eteacna wat aŋginandet. Na an watta ma mba ŋgocraiidndai. Na Raraŋ Aetaniacna lamniac ma rat ngoin, na ma mba maiitndai. Na ne man-apmo tamuŋna auŋ ndeac te, ma an iarwarna eteacna watta ma kocrorinanna, ma nenmo

1:2 Ro 1.7, na 8.29, na 2 Te 2.13, na Ib 10.22, na 12.24, na 2 Pi 1.2 **1:3** 1 Ko 15.20, na 2 Ko 1.3, na Epe 1.3, na Ie 1.18 **1:4** Kol 1.5, na 1.12, na 2 Ti 4.8, na Ie 5.4

nean̄nandet. ⁵ Na ne Karaismo ripacrenan tik, Raraŋ Aetaniaca ma ndona gargar mbuŋa nenmo raup̄ñirena, te, ne laŋ ndeacnandet. Na ma nenmo mac nda aŋgina toŋgorenan, na nenmo eteac laŋ ndeacna. Na aimo mac nda aŋgina aiŋa ma mo ndoprinanna, anna aimo mac nda aŋgina aiŋa mamamaina ra mbuŋa larui raekca tiknandet.

⁶ Na aimo mac nda aŋgina aiŋa Raraŋ Aetaniaca mona morenan, ne an ndam̄ñireke, na ne toŋgorenan. Na mandebaitna kidrik motemma, ainta totowaiara laruca nenmo gigirar nean̄nandet. ⁷ Na an tipna kirar mbuŋa, Raraŋ Aetaniaca nena ritipaikmo towairenan. Na aia lam̄ñirena, gola, ma reac laŋ ŋgoin, na mina manmo tac mbuŋa rotacrenan, te, mina mammo watna, ma gol gidik ki, co wanaiŋ? Na nena ritipaikca ma golmo kundrina, na ma laŋ ŋgoin. Na gola ma ŋgocrairena reac. Aintik titocna totowaiara nenmo laru te, anna ma nena ritipaikca towairena, nenmo wandacna, ne Karaismo ripacrenan ŋgoin, ki? Na reik mamamaina ra, Iesus Karaisa laruca raekca tik te, ma nenmo toŋtoŋ ŋgoin, na ma nenmo i aniacan̄nandet. ⁸ Na ne manmo mba watreke, na ne manmo mat̄ñirenan. Na mandeaca ne manmo mba watreke, na ne manmo ripacrenan, na mammo toŋgorenan ŋgoin. Na an toŋtoŋgara gan tiarpaikna toŋtoŋgarmo tamun̄mbai, na

1:5 In 10.28-29, na 17.11-15, na Iu 1.1 **1:6** Ro 12.12, na 2 Ko 4.17, na 6.10, na Ie 1.2, na 1 Pi 5.10 **1:7** Iop 23.10, na Np̄ 66.10, na ML 17.3, na Ais 48.10, na Sek 13.9, na Mal 3.3, na Ro 2.7, na 2.10, na Ie 1.3 **1:8** In 20.29, na 2 Ko 5.7, na Ib 11.1, na 11.27, na 1 Io 4.20

aia up mbuḡa mbopna minna wanaiḡ. Wanaiḡ ḡgoiḡ. ⁹ Aintik ne Karaismo riḡpacrenan tik, Raraḡ Aetaniaca nenmo mac nda aḡgirena.

¹⁰ Na aimo mac nda aḡḡina aiḡa nenmo mandeaca larurenanna, Raraḡ Aetaniacna kakadmaina opotacna kambta miniḡta moca, rambca morina ramtaira aiḡir anikapa opore mamoaḡ, ri, mina aimo mac nda aḡḡina aiḡna kambmo wiwitirena. ¹¹ Na Karaisna Ḥeroḡna rambca morina ramtairaḡ eacri, na ma mina iroara mbukca minmo moca mina ndorita up mbuḡa gaidopatna, Karaisna titocna giḡirar ma aḡḡirenanapa, iḡmbaia ma i aniac aḡḡinandet. Ainda moca rambca morina ramtaira digirenan, “Tumbuitta tik te, aimo mac nda aḡḡina ramootta kiḡit? Te, kaina reaca an kiḡriḡca laruit?” ¹² Na Raraḡ Aetaniaca minmo mawandacat, an reikca mina mboprenanna, mina ndorita minna mba laruitndai. Na reikca Raraḡ Aetaniaca nenmo moca, nenmo mac nda aḡḡina kamma mina anna ndoprena. Na mandeaca Raraḡ Aetaniaca Ḥeroḡ Ratmo tamuḡna auḡnandmo, mbaḡirica irikrinan, na kam wembaḡ laḡmo wiwitirena ramtaira mina nenmo an reikca Raraḡ Aetaniaca morinanna kambtoprinan. Na Raraḡ Aetaniacna mbaiḡna aiḡa morena ḡerḡgaur toco, mina an reik laiḡga Raraḡ Aetaniaca nenmo morinanmo, mitoco anna landamḡi aḡḡina toḡtoḡ aniacap.

1:9 Ro 6.22 **1:10** Dan 2.44, na Aga 2.7, na Sek 6.12, na Mt 13.16-17, na 2 Pi 1.19-21 **1:11** Ḥap 22, na Ais 53, na Lk 24.26-27, na 1 Pi 3.19, na 2 Pi 1.21 **1:12** Dan 9.24, na Epe 3.10, na Ib 11.13, na 11.39-40

Raraŋ Aetaniaca aimo rat ndeacna ŋgacrina

¹³ Aında moca ne ndorita iroara memetmbaca kocroca eacraŋ, na nena tataŋ, eteacmo matau bubuocraŋ. Na ne ritipac gargar moca Raraŋ Aetaniacmo lambi, ma nemo mo ndoprina kakadmaina opotacmo nenmo monandet, an minna Iesus Karaisa laru raekca tik te. ¹⁴ Na ne an kamma waracrena mombonikta kirar toc ndeacraŋ. Na atua ne iroar kocor, aintik ne iroar ŋgorikta toŋtoŋgara raŋgairenan. Na mandeaca ne an tipemb kirarirta toŋtoŋgarmo kai raŋgai teac, kari ŋgoin. ¹⁵ Na Raraŋ Aetaniaca ma nemo acrinan, na ma rat, na ma tip kirar laŋapa wandoik tingikca morenan. Aintik ne mana kirara rat ndeacraŋ. ¹⁶ Aintik Raraŋ Aetaniacna timbigta kapca gaindoprinan, “Aku nena Raraŋ Aetaniac rat, na ne toco ratta eacraŋ, na tipemb kirarir laŋga raŋgairan.”

Opoik aniac mbuŋa Raraŋ Aetaniaca aimo mac nda oikatna

¹⁷ Na ne Raraŋ Aetaniacmo aca aindoprenan, “Ate.” Na an Aetta ma aina kabe, kabena tipemb kirarira ma lamŋirena, na ma aimo ritrirena. Aında moca aina kabe kabea morena tipembta kirarira ma watrena, na ma aimo muruŋa kirar kabemo ritrirena. Aintik ne memetmbaca gan tiacarpaikca eacraŋ te, ne gaind ndamŋi, gan

1:13 Lk 12.35, na Ro 13.13, na 1 Ko 1.7, na 1 Te 5.6-8 **1:14** Ro 12.2, na Epe 2.3, na 4.17-18, na 1 Te 4.5 **1:15** 2 Ko 7.1, na Ib 12.14, na 2 Pi 3.11 **1:16** TN 11.44-45, na 19.2, na 20.7, na Mt 5.48 **1:17** TW 10.17, na Mt 6.9, na Up 10.34, na Ro 2.11, na 2 Ko 5.6, na 7.1, na 2 Ti 4.14, na Ib 11.13, na 12.28, na KIEK 2.23

tiacarpaikca anna nena auŋ ŋgoinna wanaiŋ. Na memetmbaca ne Raraŋ Aetaniacmo torica rugdara moca mana kaŋgauk ŋgoin ndeacraŋ. ¹⁸ Na ne lamŋirina, atuaitta ne ndorita nicarta tipemb kirarirmo aŋgica raŋgairenan, na ma nenmo otac ŋgocor. Ri, Raraŋ Aetaniaca ma nemo mac nda oikca, nena an tipemb kirarirmo mo kecaririnan. Na ma nenmo gan tiacarpaikna ŋgocrairena reik, gol, co, silwa mbuŋa nda oikrinanna, wanaiŋ. ¹⁹ Ma nemo Karaisna racaindpaik mbuŋa nda maoikat. Na an racaindpaikca ma kitukndukmo tamuŋmbai ŋgoin. Na Karais, ma sipsipna moonnuocna kirar, na mana tikca pitirapa, ndibembta ŋgeara mo ŋgocrai ŋgocor. ²⁰ Na gan tiacarpaikca Raraŋ Aetaniaca mo laru ŋgocor, ma Karaismo larapaca ma aimo mac nda oikna aiŋa morinan. Na mandeaca gan tiacarpaikna mamaina raica aia eacrenan, Raraŋ Aetaniaca ma Karaismo raekca tikrinan, na ma aimo otacrinan. ²¹ Aintik ma nenmo otaca ne Raraŋ Aetaniacmo ripacrenan. Anna ma Karaismo mukca tikca mo ŋgepca, manmo i aniac maneaŋgat. Ainda moca ne Raraŋ Aetaniacmo ripacrenan, na mana momona baburina reik laiŋta lambirenan.

Aia aina laiplacarmo matŋiran

1:18 Esi 20.18, na 1 Ko 6.20, na 7.23, na 1 Pi 4.3 **1:19** NA 12.5, na Ais 53.7, na In 1.29, na 1.36, na Up 20.28, na 1 Ko 5.7, na Ib 9.12-14, na 1 Pi 1.2, na KIEK 5.9 **1:20** Up 2.23, na Gal 4.4, na Epe 1.4, na 1.10, na Kol 1.26, na Ta 1.2-3, na Ib 9.26 **1:21** In 14.6, na Up 2.24, na 2.33, na Ro 4.24, na 5.1-2, na 10.9, na Pil 2.9, na Ib 2.9, na 1 Pi 3.22

²² Na ne kam gidikmo matau ngoinna rangairi tik, an tipna kirar mbuņa ne ndorimo ainda moatke, Raraņ Aetaniacna lamniac ngoutmo rat ndarurina. Na Iesusa ripacrena laiplacar, ne minmo matņiraņ. Aintik mandeaca ne gagaraca nikinik iroar laingap minmo memetmbaca matņiraņ. ²³ Na ne ęgaib tarurinan, an wariņ ęgaibta amta reik garena kirarir toc. Na ne wariņna mutocrena amta reik ęgorikta lour puņa mba laruritndait. Wanaiņ. Ne amta reikca memetmbaca eacrena amta reikta lour puņ tarurena. Na an wariņna amna reac mutocrena loora, anna Raraņ Aetaniacna kam, na ma eteacna watapna kam, na ma memetmbaca eacrena. ²⁴ Na Raraņ Aetaniacna timbigta kapca gaidopatna, “Meikramtaira murņcamiņa gan tiacarpaikca kidrik rocotta mba eacrenan. Na mina katgar toc tawi mairenan, na mina iremb anikca kokocara ruca irikrena kirar toc ęgirikrenan. Na ne lamņirenan, katgara mina gururenan, na kokocara mina ruca irikrenan. ²⁵ Na Kacootna kamma ma iarwar ndeacrena.” Na an kamma anna an kam wembaņ laņa mina nenmo wiwitiatnan.

2

Kacootta ma wautna wit laņa kirar

1:22 In 13.34, na Up 15.9, na Ro 12.9-10, na 1 Ti 1.5, na 2 Pi 1.7, na 1 Io 3.18 **1:23** In 1.13, na Ib 4.12, na Ie 1.18, na 1 Io 3.9

1:24 Ңap 103.15, na Ais 51.12, na Ie 1.10-11 **1:24** Ais 40.6-8

1:25 In 1.1, na 1.14, na 1 Io 1.1-3

¹ Na ne meikramtaira ŋgaib tarurinan, aintik ne nikkakatapa, paparuna kamb ndoprenanapa, paparuna tipemb kirarirmo, muruŋcamiŋa tikcari. Na kabena meikramtairmo iŋmbai ndondopapa, kabena ramootna reacmo lamniac mbuŋa watca aŋgina iroapmo, anna ne tikcari. ² Na aia lamŋirenan, moonŋnuoc teker-noc, ma mir gagamna toŋtoŋ ŋgoiŋ. Na an kirar kabea ne Raraŋ Aetaniac ndiŋa kiprina mirmo, ne toŋgoca aŋgiraŋ. Na reac ŋgoreac ianna anna mba eacrenan. Na ainta mirca ma nenmo otaca, nena ŋerŋgaurapa eteacna wat ŋgamca, moi acnainandet, na mammo gargara neaŋca, ne Raraŋ Aetaniacmo meikramtair ŋgaibca taru te, manap eteac laŋa eacnande. ³ Na Kacootta aimo ndiarna tipemb kirarira morinan, na mandeaca ne mana tarara ne mir toc ŋgambrinan, na ne lamŋirenan, Kacootta ma laŋ ŋgoiŋ.

⁴ Na Kacootta ma eteacna watapna kaca morena ikna kirar, aintik ne man ndambuŋa taŋ. Na meikramtaira manmo reac ŋgoreac toca watca mina manmo mo kecaririna, na Raraŋ Aetaniaca manmo larapaca manmo watrina, ma laŋ. ⁵ Na ne toco, ne an kaca morena eteacna watapna ikna kirar, na Ŋeronŋ Ratna gargar mbuŋa Raraŋ Aetaniaca nen mbuŋa mana kaca moa taŋraŋnande. Ainda moca ne Raraŋ

2:1 Epe 4.22, na 4.25, na Kol 3.8, na Ib 12.1, na Ie 1.21 **2:2** Mt 18.3, na Mk 10.15, na 1 Ko 3.2, na 14.20, na Epe 4.15-16, na Ib 5.12-13 **2:3** Ŋap 34.8, na Ib 6.5 **2:4** Ŋap 118.22, na Ais 28.16, na Mt 21.42, na Up 4.11 **2:5** NA 19.6, na Ais 61.6, na Osi 14.2, na Mal 1.11, na Ro 12.1, na Epe 2.21-22, na Pil 4.18, na Ib 13.15-16, na KIEK 1.6

Aetaniacna larapacrina taup ndamtairta wiwit toc ndeacnandet. Na Iesus Karaisna i mbuņa ne ndorita eteacna watmo gimbam toca Raraņ Aetaniacmo neaņ.

⁶ Na Raraņ Aetaniacna Timbigta Kapca Raraņ Aetaniaca aindoprina, “Ne warac. Aku kacna wit ianna larapacrinan, na ma kacmo mo gagrana wit paņan. Na an witta ma gargar ņgoin, na ma laņ ņgoin. Na mandeaca aku manmo, Saion takura tikrina. Aintik meikramtaira manmo, ripacrenan, mina numbira mba aņgiitndai.”

⁷ Aında moca ne an ripacrena meikramtaira, Karaisa ma wautna wit laņ ņgoinna kirar. Na an ripac kocorta meikramtair, mina aindoprina,

“Gan kaca morena wautmo
ramtaira anmo ņgoreac ndopca,
aņgira roumbmbai nakecarica eacrena
wautta,
mandeaca ma kacna witta moca
paņanmbaia witik gagraca kaca mbukca
eacrenan.”

⁸ Na Raraņ Aetaniacna timbigta kap toco aindopatna, “An ikca ma laruca mina taup mboracri, na mina an ikmo aoca latak te, mina ņgocrainandet.” Mina Raraņ Aetaniacna kammo nda mboprenan tik, mina an ikmo aoca lataka irikrenan. An tipna kirara atua Raraņ Aetaniaca mboprina.

2:6 Ais 28.16, na Ro 9.33, na Epe 2.20 **2:7** ņap 118.22, na Mt 21.42, na Up 4.11 **2:8** Ais 8.14-15, na Up 4.11, na Ro 9.22, na 9.33, na 1 Te 5.9

9 Na nenmo ma larapacrinan, na ne mana meikramtair koind. Na ne gagrirta ramootna taup ndamtair. Na ne rat ndeacrena meikramtairta wiwitnan, na ne Raraŋ Aetaniacna meikramtairta wiwit ŋgoin. Na Raraŋ Aetaniaca nenmo ndo ŋgoinna larapacrina meikramtairta wiwitnan, te, ma nenmo morina tipemb kirarir lainŋa nenmo morinanna kamb ndopna. Te, ne neaupa eacrinanapa, ma nenmo neaupa tikca aŋgica ma ndona memetaca larurina kam ndopna. Na an memetaca anna laŋ ŋgoin. ¹⁰ Na ŋgaua ne meikramtair wanaiŋ ndeacrenan, na mandeac ne mana meikramtaira larurinan. Na atuaitta ne Raraŋ Aetaniacna kakadmaina opotaca ne mba aŋgiatke, na mandeaca ne mana kakadmaina opotacmo aŋgirinan.

Kabena meikramtairmo aia mina rikmo wandoŋa taŋraŋ

(2.11—3.22)

*Aia Raraŋ Aetaniacna mbaiŋna aiŋa morena
meikramtairta kirara eacraŋ*

¹¹ Na aukna aikndamtair koind, ne gan tiacarpaikca eacrinanna, ne kabena auŋna meikramtair toco eacrenan, na ne keker toca loraca eacrenan. Ainda moca aku nenmo gaïnd mambopek, ne an atuna nena tikna iroar

2:9 NA 19.5-6, na TW 4.20, na 7.6, na 14.2, na Ais 9.2, na 40.20-21, na 43.20-21, na In 17.19, na Up 20.28, na 26.18, na Epe 5.8, na Kol 1.13, na Ta 2.14, na 1 Pi 2.5 **2:10** Osi 1.9-10, na 2.23, na Ro 9.25 **2:11** 1 Nin 29.15, na Nŋap 39.12, na Ro 13.14, na Gal 5.17, na 5.24, na Ib 11.13, na Ie 4.1

bagrarmo in neaŋ, an tipemb kirarira nena ɲeɲgaurmo ruɲrenan. ¹² Na an ripac ɲgocorta raekmbaina meikramtairta rikmo, ne wandoŋa taɲraŋ. Na mina nemo kam ɲgoreac ndop te, inmbaia mina nena morina tipemb lainŋa watca, Raraŋ Aetaniacna ritri waparacna ra laru te, mina Raraŋ Aetaniacna imo aŋgi ɲgepnandet.

¹³ Na ne Kacootmo lamɲiraŋ, na gan tiacarpaikna ramtair paɲaindapa, titocna gagrirta ramtair paɲainda, mina nenmo outta eacrenan, ne mina kaɲgaukna bubuoca eacraŋ. Na ne mina kamma raɲgairaŋ. ¹⁴ Na ne pitrik waɲna ramtair paɲaindta kam motoco raɲgairaŋ. Na Kacootta ma toɲgorena. Na an ramtairmo, gagrirta ramoot paɲanna minmo larapaca mina meikramtairta tipemb ɲgorikca morenanmo wandoŋairena, te, meikramtaira tipemb kirarir lainŋa morenanmo, mina irembmo aŋgi ɲgepnan. ¹⁵ Aintik Raraŋ Aetaniaca toɲgorenanna, ne tipemb kirarir lainŋ tiɲgikca moraŋ te, an iroar kocorta meikramtaira nenmo kamb ɲgorikca mboprenan, ne mina upembmo mboracnande. ¹⁶ Na ne tuombta aiɲir kamnderta meikramtairta kirara taɲraŋ. Na ne gainda kai lamɲi teac, “Mandeaca ne tuombta aiɲir kamnder tocna meikramtaira wanaiŋ.” Na ne taɲga tipemb ɲgorikca moraŋ. Wanaiŋ. Na ne Raraŋ Aetaniacna aiɲna ramtaira taɲrena kirara

2:12 Mt 5.16, na Lk 19.44, na Ro 12.17, na 2 Ko 8.21, na Pil 2.15, na Ta 2.8 **2:13** Mt 22.21, na Ro 13.1, na Ta 3.1 **2:15** Ta 2.8, na 1 Pi 2.12, na 3.16 **2:16** 1 Ko 7.22, na Gal 5.1, na 5.13

tañrañ. ¹⁷ Na ne kabena meikramtairmo tipemb kirarir lainga morañ, na Iesusa ripacrena laiplacarmo ne minmo matñirañ. Na ne Rarañ Aetaniacmo torirañ, te, mana kañgaukca eacrañ. Na ne gagrirta ramoot pañanmo i aniaça neañrañ.

Aia Karaisna tipemb kirarira ranğaica gıgirara mbukna

¹⁸ Na ne tuombta aınır kamndera morena meikramtaır, ne nena bubuocrena ramtaırta kañgauk ndeacrañ, te, mina kambmo matau ıgoinna ranğairañ. Na aku an ramtaır pañaind lain ıngıkca mba mboprenan, mina nenmo bubuocreke wetwetta ıkca morenanmo. Wanain. Na an ramtaır pañaind ıgorıkta kañgauk motocmo ne eacrañ. ¹⁹ Na anna gidik, ne Rarañ Aetaniacmo watcarica ma nena iroarmo ınıra mo, na ne aını mo, na mina nenmo gıgirara wanain neañrenan, na ne anna makukara mbukrenan, te, an ıpna kirarmo Rarañ Aetaniaca ma tonğorenan. ²⁰ Na ne tipemb ıgorıkca mo te, na mina nenmo pi te, na ne an makukarmo mbuk te, ne anmo kainta reik aıgıt? Aında moca ne tipemb kirarir lainga moa, na mina nenmo pi te, na ne anna makukara aıgı te, Rarañ Aetaniaca an tipemb kirarirmo ma tonğorenan.

²¹ Na Rarañ Aetaniaca ma nenmo an tipemb kirarira ranğaina maacat, na anna gaind, Karais

2:17 ML 24.21, na Mt 22.21, na Ro 12.10, na Pil 2.3, na Ib 13.1, na 1 Pi 1.22 **2:18** Epe 6.5, na Kol 3.22, na 1 Ti 6.1 **2:20** 1 Pi 3.14, na 3.17, na 4.14-15 **2:21** Mt 16.24, na In 13.15, na Up 14.22, na 1 Pi 3.18, na 1 Io 2.6

toco nen ngotacna girgirmo ma mambukat. Na ma nenmo ndona tipemb kirarirmo wandacrinan, te, ne anna rangaina. ²² Na ma tip ngoreacna makuk ianna mba mori, na ma paparuna kam ian toco mba mbopri. ²³ Ri, mina manmo kamb ngorikca mboprinan, na ma mina kamb ngorikmo mba nda rutica mbopatke. Wanaij. Ma ndomo Raraņ Aetaniacna para tikrinan, na ma ndo an reikmo muruņcamiņa wandoņ ngoinna ritri waparaca morena ramoot. ²⁴ Na Karaisa ma ndomo ik naaņgica keraca aina tipemb ngorikta makukarta moca ma ndona tik mbuņa mbukrina. Na ma ainda moca aia ndorita tipemb kirarirta tipemb ngorikta makukarmo kocnai tikcarinandet, te, aia eteacna watap eac, na tipemb kirarir wandoik koinda rangairana. Na mina manmo ngoreac ngoinna pirinan, na an gigrara ma aņgiatnan mbuņa, ma nenmo mac moa laņa morina.

²⁵ Na ne muruņcamiņa sipsipara tamtamma taņrena kirar toc ndeacrinan. Na mandeaca ne an Sipsiparta Nginana Morena Ramootta nena nerngaurmo mataua raupņirenan ndambuņa mac nda makiprina.

3

Lanņangona meikramtairta kam

2:22 Ais 53.9, na In 8.46, na 2 Ko 5.21, na Ib 4.15 **2:23** Ais 53.7, na Mt 27.39, na In 8.48-49, na Ib 12.3, na 1 Pi 3.9 **2:24** Ais 53.5, na Ro 6.2, na 6.11, na 7.6, na Ib 9.28 **2:25** Ais 53.6, na Esi 34.5-6, na 34.23, na Mt 9.36, na In 10.14, na Ib 13.20

¹ Aintik an tipna kirara ne lanʒanʒona meikpitik, ne ndorita kanʒerta kanʒauk ndeacraŋ. Na nena kanʒerta ndeida Raraŋ Aetaniacna kammo ranʒai ŋgocor te, mina nena tipemb kirarir lanʒa wat te, na ne minmo kam ianna mbop ŋgocor, mina ndorita nikinik iroarmo ŋgetrikinandet. ² Na an kidrikca mina watrina, ne meikpitikca ne wandoikca taŋrenan, na ne mina kanʒaukca eacrenan. ³ Na ne ndorita tikemb tinʒikmo kai mataua lamboi golnanapa lamboi lanʒ aoc, co, paŋaindta lakoarmo lanap. ⁴ Na ne ndorita nikinik iroarmo an ŋgocrai ŋgocorta lamboimo aoc, anna lanʒ. Na ainta lamboia anna nikinikmo lanʒapa, nikinik iro wetwet eacrena tipna kirar. Na an tipna kirara Raraŋ Aetaniacna lamniacmo lanʒ ŋgoi. ⁵ Na an tipna kirara atuna meik ratta ndorita lambirena ritipacmo Raraŋ Aetaniaca tikrenan, te, mina lamboia mina wapat lanʒa wandacrenan. Na mina ndorita kanʒerta kanʒaukca eacrenan. ⁶ Na anna kirara Sara, ma Abraammo ndona kacoot ŋgacrena. Na ne tipemb kirarir lanʒa morenan, na ne reac ianna mba nanambirenan, ne ainda mo te, ne Sarana mombonik tarunan-det. ⁷ Na ne lanʒanʒona ramtair, ne an tip kirar kabemo, iroar lanʒ ranʒai te, ne ndorita meikap matau eacraŋ. Na meikpitikta tikembca gagrar kocor, aintik ne minmo tipemb lanʒa moranʒ.

3:1 Mt 18.15, na 1 Ko 7.14-16, na Epe 5.22, na Kol 3.18, na Ta 2.5

3:3 1 Ti 2.9, na Ta 2.3 **3:4** Nʒap 45.13, na Ro 7.22, na 2 Ko 4.16

3:5 RL 18.12 **3:7** 1 Ko 7.3, na 12.23, na Epe 5.25, na Kol 3.19, na 1 Te 4.4

Ainda moca ne lamjirenan, mitoco an kakad-maina opotacapa, iarwarna eteacna wat toco anjirande. Na ne ainta tipembta kirarira rangai te, reac ianna nena mbembendeimo mba mo ngocraitndait.

Memetmbaca aia kabena meikramtairmo tipemb kirarir lainga moraj

⁸ Na mandeaca aku an kammo gaima maina mamoe, ne muruŋcamaŋa nikinik iro kabe eac te, ne Iesusa ripacrena laiplacarmo gidik ŋgoinna matjiraŋ, na ne kabena meikramtairmo kadmairaŋ, na paŋan garurna tipemb kirarirmo tikcari. ⁹ Na meikramtaira nemo tipemb ŋgorikca mo te, ne minmo kai ruti teac. Na mina nemo kamb ŋgorikca mbop te, ne an motocmo kai ruti teac. Na ne gaimda tip kirar mbuŋa gaimda ruti, ne Raraŋ Aetaniacmo mbendeica ma minmo laŋa mo. Na Raraŋ Aetaniaca nemo ainda mona acrinan, te, ne mana opotac laŋa ne anjirandet.

¹⁰ Na aia lamjirena,

“Mandaia ndona eteacna watmo, laŋa eacna mo te,

na ma eteac laŋa watna,

ma kamb ŋgorikca kai mbop teac,

na ma paparuna kambca kai mo teac.

¹¹ Na ma tipemb ŋgorikmo iŋ neaŋ,

na ma tipemb lain tingikca rangairaj.

3:8 Mt 5.44, na Ro 12.10, na Pil 3.16, na Kol 3.12, na 1 Te 5.15, na 1 Pi 2.17, na 2.23

3:9 Mt 25.34, na Ro 12.14, na 1 Te 5.15

3:10 Ie 1.26, na 1 Pi 2.1, na 2.22

3:10 Njap 34.12-16

3:11

Ais 1.16-17, na Ro 12.18, na Ib 12.14

Na ma kabena meikramtairmo nikinik iro
wetwet kabeap eacraŋ,
na an tipemb kirarirmo ma gagra
rangairan.

¹² Na Kacootna lamniaca ma meikramtair wan-
doikta watrenan,
na ma mina mbembendeimo, koar tikca
waracrenan.

Na meikramtaira tipemb ŋgorikca morenan,
ma minmo mba tonḡorenan.”

*Na tipemb kirarir lainḡa aia morenanna aia
mana ḡirḡira anḡinandet*

¹³ Na ne tip kirar lanḡa towai gagra rangai
te, mandaia ndo nenmo tip kirar ŋgoreaca moit?

¹⁴ Na ne tipemb kirarir wandoik lainḡa mo te,
na ne mana makukca anḡi te, ne anna tonḡo.
Na mina nenmo nanambina reac ianna mo te,
ne kai rugut mo teac. Na nena nikinik iroar
kai ŋgep ŋgoreac nanḡep teac. ¹⁵ Aintik nena
iroar inkara ne Karais niḡḡikmo tikca eacraŋ,
ma nena Kacoot. Na mina nenmo an reac lanḡa
ne anna lambirena miniḡna digi te, ne anna
rutina kammo memetmbaca kocroca eacraŋ.

¹⁶ Ainda moca ne mina kammo nda rutina
mo te, ne iro wetwet mbunapa, tip kirar lanḡ
mbunḡa mo. Ainda moca ne memetmbaca Raraŋ
Aetaniacna lamniacmo wandonḡ lanḡ ŋgoinna
eacraŋ. Te, mina nenmo kam ŋgoreacapa,
nenmo pepere te, an ramtaira mina nenmo

3:12 In 9.31 **3:13** ML 16.7, na Ro 8.28 **3:14** Ier 1.8, na Mt
5.10, na Ie 1.12, na 1 Pi 2.20, na 4.14 **3:14** Ais 8.12-13 **3:15**
Up 4.8, na Kol 4.6, na 2 Ti 2.25 **3:16** Ta 2.8, na Ib 13.18, na 1
Pi 2.12

Karaisna ranğairena tip kirar laŋna moca nemo peperenan, na mina mboprena an kambta moca mina numbir anğinandet. ¹⁷ Na aia tip kirar laŋa morenanna, Raraŋ Aetaniaca aimo anna girgir anğina tonço te, anna laŋ. Na aia morena tip ŋgoreacna girgir anği te, anna reac ŋgoreac.

Karaisa menaca ma nda ŋgepca aimo mac nda anğina

¹⁸ Na ne Karais motocmo lamŋi. Ma ramoot wandon, na ma meikramtair ŋgorikta taup anğica menaca tipemb ŋgorikta makukara mo kecaririnan, na nenmo anğica Raraŋ Aetaniac ndambuŋa taŋna. Aintik ma kidrik kabe niŋgikca menacrina, na ma mba mac menacitndai. Na gan tiacarpaikmo ma ramootna kirar toca eacrinan, na mina mammo mo menacatna. Na ma nda ŋgeprina, na ma ŋeronj toca eacrenan. ¹⁹ Aında moca ma ŋeronj ndeacri, ma taŋca ŋerŋgaura kac ŋgoreaca eacrenanmo kam wiwitorinan. ²⁰ Na an ŋerŋgaura mina kammo Noanna min mbuŋa Raraŋ Aetaniacna kambmo nda mbopatnan. Na Noanna minna tip ŋgoreaca aniaca larurinan, na Raraŋ Aetaniaca ma mba tawia rutiakke. Ma lambica taŋga Noa, ma ndona lanğummo moa maiatke. Na witca wanaiŋ, meikramtair parmbaiapa mbutrem mbonkac tiŋgikca mina lanğumma ŋgabukca laemb aniaca minmo anğica taŋri, na Raraŋ Aetaniac minmo nda anğica, mina

3:17 1 Pi 2.20 **3:18** Ro 5.6, na 6.10, na 8.11, na 2 Ko 13.4, na Epe 2.18, na Kol 1.21-22 **3:19** RL 6.1—7.24, na 8.18, na Ib 11.7, na 2 Pi 2.5

lanj maecat. ²¹ Na an pukca ma kitac pukca pocpocrina, na ainta taupca Raraŋ Aetaniaca nenmo kitac puk mbuŋa nda anŋirenan. Na kitac pukca ma nena tikna patiŋa mataunanna wanaiŋ. Anna ne Raraŋ Aetaniacmo digica ma nenmo moca ne iroar inkara laiŋga mana lamniaca ŋgout ndeacna. Na nenmo mac nda anŋina moca Karaismo mukca tikca mac nda anŋica ŋgepatnan. ²² Na mandeaca Karaisa tamuŋna auŋ mac nda taŋrinan, na ma Raraŋ Aetaniacna par umbaia mbiraca eacrenan. Na mbaiŋna aiŋa morena ŋerŋgaurapa, gargar anikapna ŋerŋgaur, na gargarapna reikca mina muruŋa mana kaŋgaukca eacrena.

Totowai aniaca ritipacna laiplacarmo laruca mina girgir anŋiatna

4

(4—5)

*Aia nikinik iroar bagrarta iroarmo
ndarekrekke*

¹ Na Karaisa ma ndona tikna girgir aniaca anŋiatna, aintik ne toco an iro kabea ma anŋiatnanmo, ne an iro motocmo utiŋ gagara. Ainda moca nena ianna ndona tikna girgir

3:21 Ro 10.10, na Epe 5.26, na Ta 3.5, na Ib 10.22 **3:22** Nap 110.1, na Mt 22.44, na Ro 8.34, na 8.38, na 1 Ko 15.24, na Epe 1.20-21 **4:1** Ro 6.2, na 6.7, na Gal 5.24, na Kol 3.3-5

anġi te, ma tip ngoreacna makukna tip kirara ma tikcaririnan. ² Na an minna ne tik mbuġa eacrena, ne iro bagarna tonġonmo mba ranġaiitndai. Wanaij ngoin. Ne Raraġ Aetaniacna iro ningikca ranġainandet. ³ Na ne nikinik iroar bagrarta tipemb kirarirmo ranġaica moa taġtaġa minna matikri, na an tipemb kirarira ritipaik kocorta raekmbaina meikramtaira tonġorenan ngoin. Na an tipemb kirarira meikramtaira morenanna, anna tipemb ngadudukarapa, nikinik iroara moa ngepca reik ngorikca morenan, na puik gagrara amba njaġaorena tipemb kirarirapa, runduik anikca morenan, na amtiambca moca amta reik anikca ambrenan, na puik gagrara amba tipemb kirarir ngorikca morenan, na Raraġ Aetaniacna tipemb kirarirmo ndarenan, na mirpembraraijmo mbendeirenan. ⁴ Na mandeaca ne an tipemb kirarira an ritipaik kocorta meikramtairapa mba morenan. Na mina anna moca ngep ngoreac nangepca nenmo peperena kamb ngorik toprenan. ⁵ Aintik inmbaia mina ndorimo ritri waparaca witik te, mina ritri waparac aniacna ramootna outta witikca ndori moatna reikmo manmo mbopnandet. Na an ritri waparacna ramoot, ma kocroca an menacrinanapa, menac kocorta meikramtairta tipemb kirarirmo ritrinandet. ⁶ Aintik anna mininja moca an menacrina meikramtaira mina

4:2 In 1.13, na Ro 6.11, na 2 Ko 5.15, na Gal 2.20, na 1 Io 2.16

4:3 Up 17.30, na Epe 2.2-3, na 4.17, na Ta 3.3 **4:4** Up 13.45, na 18.6, na 1 Pi 3.16 **4:5** Up 10.42, na 17.31, na 1 Ko 15.51-52, na Ie 5.9 **4:6** Ro 8.10, na 1 Ko 5.5

menac ngocor ndeacri, mina kam wemban laja mina waracrinan. Na anna gidik, mina menacrinan, an kirara meikramtaira muruŋa tipemb ngorikta makukara morenanna mina menacrinan. Na mandeaca mina iarwarna eteacna wat aŋgica mina ɲeɲgaurta kirar toco eacnande, na an kirara Raraŋ Aetaniaca eacrena.

Raraŋ Aetaniaca aimo wanaiŋa neaɲrina reik laiŋga aia matau aiŋa moraŋ

⁷ Na reikta mamaina kidrikca kipca marambunairi. Ainda moca ne kai ɲaŋao teac, ne ndorita tipemb kirarirmo matau raupɲi, te, ne matau mbendeinandet. ⁸ Na ne Raraŋ Aetaniacna meikramtairmo matɲirena tipemb kirarirmo, matau utiŋa gagra. Na kabena meikramtairmo matɲirena tipna kirara ma tipemb ngorikta makukar witmo, mo irikrenan, na ma kabena tip kirarmo kundrena. ⁹ Na Raraŋ Aetaniacna kabena meikramtaira nenap kipi eac te, ne minmo matau ɲgoinna raupɲi. Na ne an aiŋa mo te, ne kai kekelamun ke teac. ¹⁰ Na Raraŋ Aetaniac ma nenmo kabe, kabemo, kadmaica ma nenmo ndona kakadmaina opotaca wanaiŋa neaɲrenan. Ainda moca ne kabe, kabea mana aiŋna ramoot laŋ ndeacraŋ te, Raraŋ Aetaniacna meikramtair damarmo, ma nenmo wanaiŋa neaɲrina kakadmaina opotaca

4:7 Mt 24.13-14, na Lk 21.34, na Ro 13.11-12, na 1 Ko 10.11, na Pil 4.5, na Kol 4.2, na 2 Pi 3.9, na 1 Io 2.18 **4:8** ML 10.12, na 1 Ko 13.7, na Kol 3.14, na Ib 13.1, na Ie 5.20, na 1 Pi 1.22 **4:9** 2 Ko 9.7, na Pil 2.14, na Pm 1.14, na Ib 13.2 **4:10** Ro 12.6-8, na 1 Ko 4.1-2, na 4.7, na Ta 1.7

minmo an mbuḡa otacraḡ. ¹¹ Aında moca ramoot ianna ma kam wembaḡ laḡ wiwitina kakadmaina opotacna reac laḡa wanaiḡa aḡḡi te, ma an mbuḡa kam wembaḡ laḡmo wiwiraḡnandet. Na ramoot ianna ma kabena meikramtairmo otacrena aiḡa mo te, ma an aiḡmo Raraḡ Aetaniaca manmo neaḡrina gargar mbuḡa moraḡ. Te, an reicka ne muruḡa morenanna, meikramtaira an mbatnandet, na Iesus Karaisna i mbuḡa mina Raraḡ Aetaniacna i aniacmo aḡḡi ḡgeḡnandet. Na ma i aniacapa, gargarap memetmbaca iarwara eacraḡnandet. Na anna gidik.

Na Karais aḡḡirina ḡirḡir tocmo aia toḡgoca aḡḡiraḡ

¹² Ne aukna aikndamtair koind, tac tocna totowai ianna nenmo larurenan. Na ne kai ḡgeḡ ḡgoreac naḡgeḡca ḡaında kai lamḡi teac, anna reac dam ḡḡoinna nenmo larurenan. Wanaiḡ ḡḡoin. ¹³ Na an minna Karaisa aḡḡiatna ḡirḡira, ne toco aḡḡirinan, aintik ne toḡgoraḡ. Aında moca Karaisna i aniacapa gargar aniaca laruca raekca tikrina, na ne toḡtoḡ aniac ḡḡoinna monandet. ¹⁴ Na ne Karaisna imo, ne utiḡga eacrenan, na anna moca mina nemo kam ḡḡorik top te, ne toḡgoraḡ. Aında moca ne lamḡirenan, Raraḡ Aetaniacna ḡeroḡa, ma i aniacapa gargar aniacapna ḡeroḡ, na ma nenap eacrenan.

4:11 1 Ko 3.10, na 10.31, na Epe 5.20, na 1 Pi 5.11, na KIEK 1.6

4:12 1 Ko 3.13, na 1 Pi 1.6-7 **4:13** Up 5.41, na Ro 8.17, na 2 Ko 1.7, na 2 Ti 2.12, na Ie 1.2, na 1 Pi 1.5-6, na KIEK 1.9 **4:14** ḡap 89.50-51, na Mt 5.11, na 2 Ko 12.10, na Ie 1.12, na 1 Pi 2.20

¹⁵ Aintik ne ndorimo matau wat, moca mina nenmo gigirar neaŋ nari, moca ne ramoot ianna mo menacri, co, reik makimrina, co, ne kabena tipemb ŋgorikca mori, co, ne kabena meikramtairta aiŋmo ndiaŋga aŋgirinan. ¹⁶ Na ramootta Karaisna meacramoot ian ndaru te, na anna miniŋna moca ma girgir aŋgi te, ma anna moca numbira kai mo teac. Wanaiŋ, ma an i, Karaisnandna moa ma tonŋoraŋ, na Raraŋ Aetaniacna imo aŋgica ŋgepraŋ.

¹⁷ Na Raraŋ Aetaniacna ritri waparacna ra kipca laru te, aia mana meikramtaira ma aimo ritri waparaca monande. Na an ritri waparaca aimo outta laru te, ma titoca tikca an Raraŋ Aetaniacna kam wembaŋ laŋmo ndarena meikramtairmo moitndai? ¹⁸ Ainda moca Raraŋ Aetaniacna timbigta kapca aindoprinan, “Meikramtair wandoik laiŋmo mac nda aŋgina owai te, an meikramtaira Raraŋ Aetaniacmo iŋ neaŋrenanapa, tipemb ŋgorikta makukara morenanmo tida moit?” ¹⁹ Ainda moca Raraŋ Aetaniacna tonŋon mbuŋa ramtair ndeida girgir aŋgi te, an ramtaira ndorita iarwarna eteacna watmo mana para tik te, mina tipemb kirarir laiŋ tingikca moraiŋ. Na Raraŋ Aetaniaca ma ndo aimo morinan, aintik memetmbaca ma aimo mataua raupŋirenaiŋ.

5

4:15 1 Te 4.11, na 1 Ti 5.13, na 1 Pi 2.20 **4:16** Up 11.26, na Pil 1.20 **4:17** Ier 25.29, na Mal 3.5, na Lk 10.12-14, na 23.31, na 2 Te 1.8 **4:18** ML 11.31, na Lk 23.31 **4:19** Njap 31.5, na Lk 23.46, na 2 Ti 1.12

Na ne ramtair paṅainda ne Raraṅ Aetaniacna meikramtairmo matau raupṅiraṅ

¹ Na mandeaca aku Iesusna ritipaikta meikramtairta tumnambta ramtair paṅaindmo kam gargarap. Na auk toco, aku nen točna ramoot paṅan, na aku ndona lamniac mbuṅa watrinanna, Karaisa ma girgir aṅgiatnan. Aintik aukapa, nenapmo Raraṅ Aetaniaca aimo muruṅa aṅgi ndoprina reik lainṅa, ma aimo neaṅnandet, na Karaisna i aniacapa gargara raek ndaru te, ma neaṅnandet. Ainda moca aku nenmo ramtair paṅaindmo mo ṅgepca ne aiṅmo ainda monan. ² Aintik ne Raraṅ Aetaniacna meikramtairmo matau raupṅi. Na mina sipsipna kirar toco nena paira eacrenan. Aintik ne an aiṅa momona kabena ramtairta toṅtoṅgara kai raṅgai teac, ne an kirara Raraṅ Aetaniaca nemo mona toṅgorenanna raṅgairṅ. ṅarikca ne kabena meikramtairta toṅtoṅa raṅgaica an aiṅa moca kituknduk ningik aṅṅinan. Wanaiṅ. Ne an aiṅa momona toṅtoṅ aniacap moran. ³ Na ne kai ramtair anikta kirara moa an meikramtairmo, Raraṅ Aetaniaca nena para tikrinanmo aṅṅica pikinna tikna. Wanaiṅ. Ne tipemb lain ṅingikca moran, te, mina an mbatca raṅgairṅna. ⁴ Na ne ainda mo te, an minna Sipsiparta ṅginanṅa Morena Ramoot Paṅanna raekca laru te, ne outta katumma ootca

5:1 Up 1.8, na 1.22, na Ro 8.17-18, na KIEK 1.9 **5:2** In 10.11-13, na 21.15-17, na Up 20.28, na 1 Ko 9.17, na 1 Ti 3.3, na 3.8, na Ta 1.7, na 1.11, na Pm 1.14 **5:3** ṅap 74.2, na 1 Ko 3.9, na 2 Ko 1.24, na Pil 3.17, na 1 Ti 4.12, na Ta 2.7 **5:4** 1 Ko 9.25, na 2 Ti 4.8, na Ib 13.20, na 1 Pi 1.4

anğirena reac laņa ne anğinandet. Na an reac laņa ma iarwar ndeacraņnande, na ma mba ņgocrairena.

Aia ndorimo Raraņ Aetaniacna para tik

⁵ Ainda moca ne ramtair ņgaibca ne ramtair paņainda kaņgaukca eacraņ. Na ne meikramtaira muruņa pikinna eacrena tipna kirara raņgaica, ndorimo Raraņ Aetaniacna meikramtairta kaņgaukca eacraņ. Na aia lamņirenan, “Meikramtaira ndorita irembmo anğira ņgeprenanmo, Raraņ Aetaniaca minmo anğira irikrenan. Na an meikramtaira ndorita irembmo anği irikrenanmo, ma minmo kadmaica minmo tip kirar laņa morenan.”

⁶ Ainda moca ne ndorita iroarmo, mo irikca Raraņ Aetaniacna raupņina gargar aniacna kaņgauk ndeac. Na ma ndo larapacatna kidrikca laru te, ma nenmo anği ņgepnandet. ⁷ Na Raraņ Aetaniaca ma nena moca kadmairena. Ainda moca makukara ne muruņa mbukrenanmo, ne mana para tik.

⁸ Na ne kai ņaņao teac. Nena puņdamoot, Paparuna Ramootta, ma laionna kirara kamb anikca keca meikramtair amna orea taņrena.

⁹ Aintik ne ripac gagraca witikca manmo ndaraņna. Na ne lamņirenan, nena Iesusa ripacrena laiplacara gan tiacarpaikca tamtam ndeacrenan, mitoco ainta gigirara anğirena.

5:5 ML 3.34, na Ais 57.15, na Epe 5.21, na Pil 2.3, na Ie 4.6 **5:6** Mt 23.12, na Lk 14.11, na 18.14, na Ie 4.10 **5:7** ņap 37.5, na 55.22, na Mt 6.25-30, na Pil 4.6 **5:8** Lk 22.31, na 1 Te 5.6, na KIEK 12.12 **5:9** Up 14.22, na Epe 6.11-13, na 2 Ti 3.12, na Ie 4.7

¹⁰ Na Raraŋ Aetaniaca ma kakadmai muruŋna miniŋ. Na ma nenmo Karais Iesus mbuŋa acrinan, te, ne mana memetacna tac aniacna iarwar ndeacrenanna, ne manap eacnande. Aintik ne gıgirarmo kidrik matip motemma aŋŋinandet, te, iŋmbaia ma ndo ŋgoinna, nenmo laŋ mac monandet, na nena ritıpaikmo moi gagranan, na nenmo moca ne iarwara witıkca gagaranaŋandet. ¹¹ Na ma ndo kabe niŋgıkca iarwarna gargarap eacraŋandet. Na anna gidik.

Kamb tipemb ndeid

¹² Na Sailasna opotac mbuŋa aku gan timbiŋ rapar tipna kambca nenmo tirca neaŋga kipapeknan. Na aku watrinanna, ma aina kakana kirar ŋgoin. Na gan timbiŋ rapar mbuŋa aku nenmo Raraŋ Aetaniaca morina tipemb kirarirmo muruŋa mbopna, ma ndona kakadmimo nenmo wandacrenan. Na anna aku ndo watta garacrına, anna mana kakadmai ŋgoin, aintik aku nenmo mbopca mawaracek. Na aku nena nıkinik iroara mo ŋgepca, ne an mbuŋa witıkca gagrana.

¹³ Na an Babilonna Iesusna ritıpaıkta meikramtaırta tumbuna anna Raraŋ Aetaniaca nenap larapacatnanna, mina nemo ra laŋ neaŋrinan. Na aukna nuoc Mak, ma toco nemo

5:10 2 Ko 4.17, na 1 Te 2.12, na 2 Te 2.17, na 1 Ti 6.12, na Ib 13.21, na 1 Pi 1.6 **5:12** Up 15.22, na 15.40, na 2 Ko 1.19, na 1 Te 1.1, na Ib 13.22, na 2 Pi 1.12 **5:13** Up 12.12, na 12.25, na 13.13, na 15.37-39, na Kol 4.10, na 2 Ti 4.11, na Pm 1.24

ra laŋ neaŋrinan.* 14 Na ne muruŋcamiŋa kabena ripacrena laiplacarmo pipopotac te, anna wandacnandet, ne minmo mamatŋi ŋgoin, na ne minmo iroar inkara laiŋ neaŋrena.

Na ne Karaisap miŋk te, nena iroar inkara wewettar laiŋap eacnandet.

* **5:13** Na Pita Babilon auŋna kam ndoprinanna, anna ma Rom auŋ aniacna kam roor ndopatna, aintik ma an auŋna imo acatna. Na anna gaiŋd, Pitana minna Romnaŋgepca mina Raraŋ Aetaniacna meikramtairmo, ainta tipemb ŋgorikca morena, atua Babilonnaŋgepca ainta tipemb kirarira minmo morina. **5:14** Ro 16.16, na 1 Ko 16.20, na Epe 6.23

**Raraŋ Aetaniacna Kam Wemban Lan
New Testament in Mborena Kam language
Nupela Testamen long tokples Mborena Kam long
Niugini**

copyright © 2016 Pioneer Bible Translators

Language: Borei

Translation by: Pioneer Bible Translators

© Pioneer Bible Translators Association of Papua New Guinea, Inc.; ©
Pioneer Bible Translators of Dallas, Texas, USA

This translation is made available to you under the terms of the Creative
Commons Attribution-No Derivatives license 4.0.

You may share and redistribute this Bible translation or extracts from it
in any format, provided that:

You include the above copyright and source information.

You do not make any derivative works that change any of the actual
words or punctuation of the Scriptures.

Pictures included with Scriptures and other documents on this site are
licensed just for use with those Scriptures and documents. For other uses,
please contact the respective copyright owners.

2022-06-21

PDF generated using Haiola and XeLaTeX on 11 Nov 2022 from source
files dated 29 Jan 2022

8e1073ed-d2dc-5f3a-bb48-5406185123a7